

Cama Tsətsəfə Nə Bulusu Anə Fəlimonu

Usa Dzau

¹ Cama tsətsəfə kə sara ara Bulusu ndəra wu fursəna arya Kərsiti Yesu, ənga Timathlawusu zamər mən,

A nda nə Fəlimonu bazhi huda mən ənga ndər məl thlərər mən,

² ənga anə kwamər mən Afiya, ənga Archipusu bazhi wu bwaḅwatər mən, ənga anə daḅə dzə njir nu kəra a vər kaḅə wu ki ngau.

³ Bəgə mayiwakur ənga hudə pərtəu sara ara Hyal Dərmən ənga Thlagər mən Yesu Kərsiti ja ng-gya ənga hyi.

Kədi Hyal ənga Lə Usaku

⁴ Ya vər usaku anə Hyal cumu kalar pəcira ya vər kədi Hyal anə ngau,

⁵ arya a nggar yi ar kəra mbərsa ngau wu Thlagə Yesu ənga yiwukur ngau anə patər nji cici gə Hyal.

⁶ Ya vər kədi Hyal aga hya da nənə wu nggya wu cir zəmər hyi wu mbərsa, aga hya nəbiya dzə wu sənbiya sə wu kalar sə mənəhə kəra mən əni wu Kərsiti.

⁷ Yiwukur ngau a nə da ri hudə pipida ənga tsətsəku dəfu, arya nagau, zamə da, a tsətsəkur gə dəfuwa nji cici gə Hyal.

Kədi Bulusu Arya Onisimus

⁸ Agabangau, arya kau, a sən ta'yi yau wu Kərsiti aga ya cuwa ngə ga məl səra kakal ga kyaga məl,

⁹ alaga abangau, ya vər kədi ngau wu yiwukur. Nayi Bulusu, ndəra dəgal hahal ənga kabangəkau ndər fursəna arya Kərsiti Yesu,

¹⁰ ya vər kədi ngau arya zər də Onisimusu, ndəra də zər də ar pəcira yi wu fursəna.

¹¹ Dədəməu, a'yi ja ndər kətiya ndə mai, ama kabangəkau, a dar ja ndər kətə ma gyapə ma.

¹² Ya vər sə nyi a ndəra gau, naja ndəra wu dəfuwa yau.

¹³ A yiwur yau aga ya səbiya nyi əgya yau, aga ja məl thlər ar viya gau anə də, ar pəcira yi wu fursəna arya tətəlna ndəshigu.

¹⁴ Ama nayu yiwu ya məl kalar sə ənga gəra hənggəri ngə mai, aga kalar mənəhəkur kəra gə məl ja də sə yiwu huda gau, a'yi sə caca mai.

¹⁵ Ma vanyi səra də hyi təkəbiya dzə ənga ja nə pəci kushi kau, aga ga bəra sən dləwur nyi, hya nggya nə ba'anuwa ngau.

¹⁶ Ga dləwur nyi, a'yi ar viya mafa mai, ama ar viya səra ndiya mafa, ar viya zamə kəra gu yiwu. A yiwu nyir yi gagaɗau, anə ngə tsu, ga yiwu nyi a ndiya kəra ya vər yiwu nyi, gyapə wu ndəndəkur ənga zamə wu Thlagəu.

¹⁷ Ma gə hər də ar viya bazhi daḅə kər, dləwur nyi ənggər kəra ga dləwur də.

¹⁸ Ma ji məliya ngə səra dəmwa'yu, alaga ga vər nu nyi məl nə kalar sau, ba ga fəri a dar kəra yau.

¹⁹ Nayi Bulusu, nayi nga vər tsəfə najaka sau ənga tsa yau, yu nda kina ngau, a sara nja na ya vər nu ngə məl nə pi nə Hyal kəra gə uya lagu də mai.

²⁰ Zam da, ya vər cim aga ya uya akkəri ara gau lagu Thlagəu. Ba ga dzəgwa pına hudə yau wu Kərsiti.

²¹ A'yi yi ənga papakur kər ənga bəlar sə ngau, ca ngə da yi tsəfə najaka sau anə ngau, ara a sənər yau, gu nda məliya a ndiya kəra yi nar ngau.

²² Sə zəm kəra ya vər na, ca ngə ga fıya da vir pida, ara ya vər dənga abər nju shabiya da a shili ara hyi arya kədi Hyalər hyi.

²³ İpafərasu, bazhi fursəna da arya Kərsiti Yesu, ja vər usa ngau.

²⁴ Abangə tsu Markusu, ənga Aristakusu, ənga Dimasu, ənga Luka bazhi məl thlər da, nda vər usa ngau.

²⁵ Bəgə mayiwakur nə Thlagə Yesu Kərsiti ja nggya ənga mambələr hyi . Amina.

Ndəshigu'yar Fodəu Ənga Thlər Cama'yar
The New Testament in the Marghi South language of
Nigeria: Ndəshigu'yar Fodəu Ənga Thlər Cama'yar

copyright © 2024 The Seed Company

Language: (Marghi South)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

63471087-0de7-5f4b-aa1f-ca2e66571a95